

XAKUENTO LA'ATAM JA'O'XCHO'ONU' SKAW

Autor y dibujante:
Armando Rodríguez San Juan



Xakuento La'atam

Ja'o'xcho'onu' Skaw

Autor y dibujante:
Armando Rodriguez San Juan

La'atam wilchan ma xlakmin'otajuncha ixnik'an an jatapakxat. Wal cuncha an la'atam skaw lhipuxkaunilhi, li para jantu kamin'olh an xnik'an.

An skaw wa lhile'ejcha lal, ma'al lhinauna' an xkuxi.

P'uľna paxto'lhi la'atam xump'ip'i, naulcha an skaw:

--¿Uxint'i jantu t'ama'uy kuxi?

Ja'altayanal an xump'ip'i:

--Ka chun.

Pus naulhi an skaw:

--K'ap'ina'p'i ini' an la kincha'a'.

--Kalayacha, --naulhi an xump'ip'i.

Wa chuncha lhinaulhitsukulcha an skaw an xkuxi. Lhijunilcha an piyu', an xtan, chi an x'oyun. si janunil li ma la xcha'a' kata'ana' inin.

Pus wa chuncha an skaw cha'ancho'olcha an la xcha'a'. Wa chuncha pants'ikischa walh, cha'alcha an xump'ip'i.

Najuncha:

--Aklihi'anacha an kuxi.

Naulhi an skaw:

--Chun. Pero k'ap'akxa tam pants'ikis. Tuka' lhichinkan. Mientra k'ap'inchik'a tats'e'ni' an laka jamakxtal. Walay un an piyu', mu wachu' kamina'.

Wal alcha tats'e'ni'. Pants'ikis wal, cha'alcha an piyu'. Najuncha an piyu':

--Kmintacha ini' an kuxi.

Nawpalcha an skaw:

--Chun. Pero k'ap'akxa tam pants'ikis. Lisna nakcha ch'awani, k'ap'inchi an laka jamakxtal, ancha ikla'ts'il tanul la'atam xump'ip'i.

Wa chuncha an piyu' al jalkt'ilni' an laka jamakxtal. Wal lakcha'alhi an xump'ip'i, chi ul.

Wa chuncha naul an skaw, junil an piyu':

--K'at'ats'e't'i. K'ap'ichitauk'a an laka k'iw. Wa lay ka'un an xtan. Mu wachu kamina'.

Wa chuncha pants'ikis wal, cha'alcha an xtan. Najuncha:

-- Ikmintacha ini' an kuxi.

Naupalcha an skaw:

--K'at'ip'akxacha. Ankantaka' ik,



pero li sawalcha ch'awani, k'ap'inchi an
anu' laka k'iw. Wa li kla'ts'il x'akla'ukal
la'atam piyu'.

Wal chuncha alhi an xtan. Tauk'al chi
lhitajul an piyu', chi ul.

Wa chuncha an skaw naupalcha.:

--K'at'ats'e't'i. Antan anu' japulho'o',
porke katamina' x'oyun. Chi wa lay

tama'nin.

Wal pants'ikischa wal, tacha'alcha an x'oyun. tanaul:

-- Ikmintaucha inin an kuxi.

Naupalcha an skaw:

--Chun. Pero k'ap'akxant'it. Ankan-taka' ik. Lisna lakch'awanatcha, k'ap'inch'i'it an tan awinti japulho'o'. ancha wa li nak tanuy la'atam xtan. Pus ta'alhi an x'oyun, chi tala'cha'alhi an xtan. Tama'nil.

Wal chuncha taminpalatacha an x'oyun. Talhasakmininpalaycha, jajunkan li ma kalhichinkanacha. Pero an x'oyun tu tapakxanputun ali'. Wa se'cha tala'ts'in an skaw.

Wal an skaw kalhimach'axalhi li wa talakats'akamaputuncha. Las naulhi an skaw:

--Lhichinkal, lhichinkalcha.

Wal chi wa ancha x'ulatal an kuxi an xcha'a'. Las ki'il, so'oj so'ojcha japulkani.

Wa chuncha an x'oyun talhi'alcha an kuxi, talhi'anilcha an ix'ukxtink'an.

Wa chuncha pula'ojoy an aniy kuento.

